



Estimado/a xerente:

No ano 1975, a ONU celebrou por primeira vez o 8 de Marzo como Día Internacional das Mulleres. Desde aquela, esta data foi adquirindo unha dimensión global desde o punto de vista institucional como punto de converxencia das accións dirixidas a promover os dereitos das mulleres e a súa participación na vida política e económica. Na Concellaría de Igualdade do Concello de Santiago consideramos que estes esforzos por converxer nas actuacións encamiñadas á promoción da igualdade deben basearse en traballar cunha perspectiva máis ampla e moito máis aló dun só día. Ademais, estimamos prioritario incorporar unha perspectiva comunitaria e participativa que busque sinerxias cos diferentes colectivos e axentes sociais para que o fomento da igualdade entre mulleres e homes sexa un obxectivo de toda a cidadanía.

Partindo desta perspectiva, este ano, no marco da conmemoración do Día Internacional das Mulleres, estamos traballando na creación da marca de cidade Compostela, Territorio das Mulleres, que poñerá en valor tanto os lugares e espazos que teñen relevancia no relato histórico das mulleres como os axentes sociais e económicos que están promovendo a igualdade de oportunidades entre mulleres e homes en Compostela.

Dada a importancia dos sectores da hostalería e o turismo no desenvolvemento económico e social da cidade e a súa capacidade de influencia, tanto na veciñanza como nas persoas que nos visitan, gustaríanos que ámbolos dous fosen un axente motor no proceso de creación de Compostela, Territorio das Mulleres. A proposta concreta que lle facemos á rede de hoteis, hostais, restaurantes e oficinas de turismo de Santiago é a de valorar que contidos, relacionados co fomento da igualdade de oportunidades entre mulleres e homes, poderían incorporar nas súas prácticas e espazos. O resultado será a emisión dun distintivo para aqueles establecementos que traballen nesta perspectiva así como a publicación dun mapa da cidade que faga público ese compromiso e a creación dunha plataforma web para a súa difusión e comunicación.

Convidámolo/a a participar activamente nesta iniciativa que, consideramos, servirá para explorar unha dimensión turística orientada a facer de Compostela unha cidade amigable coas mulleres, e cuxa marca axudará na consolidación da capital galega como destino turístico.

Para unirse a esta campaña pode chamar, enviar SMS ou Whatsapp, antes do 8 de marzo, ao número 646003343 ou escribir ao enderezo territorioidasmulleres@gmail.com. Agardando contar coa súa participación, reciba un cordial saúdo.

Marta Lois
Concelleira de Igualdade,
Desenvolvemento económico e Turismo